



09972

明繆昌期著

貢御史傳

涇縣潘錫恩校

憲學齋

御史貢公名安甫字克仁號學靜以御史言事削籍其再起爲山東僉憲有所不得志輒拂衣去故仍稱御史云公以憲治乙卯與父斌同舉應天丙辰成進士授長垣令其治邑一本於節愛而精心搜剔有神明稱尋以卓異徵拜南京浙江道監察御史公入臺便稟稟有澄清天下志時戚畹壽寧侯張鶴齡怙寵驕恣招納無賴罔利侵民蔓延及於南中商賈爲梗公約同官抗章劾之與戶部主事李夢陽南北相應壽寧啗之次骨賴孝廟仁聖弗罪也武廟嗣位考功郎楊子器以山陵事下詔獄公疏力救兵部尙書劉大夏以請老放歸公疏強留識者韙之亡何逆瑾擅政元老劉健乾坤正氣集卷三百七

謝遷相繼引去公與南給事戴銑等南御史薄彥徽等交章力諫臺疏出公手其畧曰近月以來每聞陛下視朝太遲遊戲無度常與內官馬永成劉瑾等走馬擊毬放鷹逐犬劉健等身居輔導之官受先帝憑几之命無計回天輿言去國若使遠聽其長往恐股肱之體日削肘腋之變旋生願陛下自爲計疏入瑾大怒矯旨悉逮諸言者發鎮撫司刑訊拷掠無數公楚不勝意氣自如旋收錦衣獄械繫者久之會主事王守仁疏救諸言事錮獄者瑾大怒矯旨廷杖三十發編戶公自是直聲動天下矣歸家闔門養病終歲不入城市直指使者監司守令慕公名每迂道入山屏騶從請與公一見不可得也瑾伏誅詔還言者官銓部屢推公皆謝不起再以言官薦起山東僉憲公勉爲一出不三月引疾歸矣蓋公性負骨鯁見正德中時事多舛每裂毗出血叫呼不能己已旣身在外

臺度不能有所補拾遂有浩然之志後臺臣胡文靜撫臣伍文定疏薦公可大用卒不起公居家事繼母嚴父以孝聞論曰讀公丙寅封事可貫日月世多稱薄公彥徽以彥徽疏首也鄉人言疏出公手初擬獨上竟署全臺名余始不信及考逆瑾所榜朝堂黨人名南臺以公爲首最後及彥徽乃徵云然公孝友廉潔彬彬德讓與近世一節自豪百類不掩之士隔霄淵矣同時與黨籍者有主事黃公昭御史史公良佐皆江陰人也矯矯負大節黃文采尤可觀惜乎邑乘畧弗盡志并著之於此

湯大理傳 載毘陵誌

大理卿湯公名沐字新之號沂樂少有文行舉成化丙午鄉試第六宏治丙辰登進士第授崇德令三載崇德大治召爲山東道監察御史立臺侃侃出按汴秦晉擊貪吏抑豪強三尺無所貸時逆

乾坤正氣集 卷三百七

二

瑾擅政外吏以贓墨將敗者納賂於瑾瑾爲道地於撫按賂多者輒得首薦賂不入者雖賢反得刺瑾欲以私奪公公不可遂出爲湖廣按察僉事未至官謫武義令瑾敗起廣東僉事督理鹽政剔蠹櫛垢鹽政一新遷福建副使會丁丑大計楊文襄公一清典銓衡手疏才節堪公輔者數人請特表以示風勵公與李康惠公承勛首被紀錄時論以爲計典光尋陞江西按察使歷浙江廣東左右布政使嘉靖改元拜都察院右副都御史巡撫貴州改巡撫四川芒部寇亂公至旋削平之召入爲大理寺卿會大禮議起公與九卿同志者上疏抗辨再三一據經典無所附麗至是公別歷中外垂三十年望實交暢國是方倚公重輕而大獄之起矣天子旣入武定侯言移罪御史事下三法司覆議公心知上意所向每會議則正色昌言曰律令高皇帝所定也臣死不敢縱舍啓奸宄之

心傷平明之治用是三奏讞三不稱旨竟與尚書顏頤壽都御史聶賢等同得罪免官天下聞而寃之公家居六載廷臣爭薦公無慮數十章卒寢不報公性嚴整閨門之內肅若朝典見鄉曲新貴車蓋至其門故偃蹇不出出則自僦上坐以折其氣及與父老故人班坐泥飲如微時使人忘其既貴其推輓後輩不惜齒牙有味乎其言之也生平廉潔自喜月俸之外饋遺屏絕故居官三十餘載位踐大卿而門戶冷落幾同寒士僅有竹庄數畝而已年七十二終於家論曰湯公之爲御史以至廷尉守法不撓居鄉黨顏色無所假可謂倨遂自如孤立行一意者矣乃能與田父野老修布衣歡折節少年文士抑何款款篤厚長者也公與貢公安甫俱宏治丙辰榜俱以直節顯貢公早退天不假年公爵齒稍逾勝矣秦陵之末不得盡公用與康陵之掩公於宵人時也公之晚遇永陵

乾坤正氣集

卷三百七

三

而卒以官理坐廢惜哉

張澄源先生傳

先生姓張氏名汝翼字雲程邑之青陽里人也其自署澄源于以尚書教授郡邑學者稱之曰澄源先生先生品第在儒林獨行之間歿而祀于瞽宗學士大夫傳相紀述旣章章不朽矣而伯子履正每謂昌期子里人居恒好稱說者舊軼事可爲我公別立傳以備他日修邑乘者採擇昌期唯唯傳其大者張之先無錫人也自先生父玉溪翁徙江陰好行陰德以醫活人無數先生六歲受書至論語父母之年不可不知便低頭悲咽師怪問之曰吾念吾父母耳十四應里選有奇童之目稍長試爲里塾師先生家貧歲取館糈以給父母衣食玉溪翁好飲則先生預付酒家錢使任翁傾釀而身逆于所往扶攜以歸會歲祲諸姊諸姊子皆來食先生分

糜給之不以羈恥告也亡何補子衿有時譽而母樂孺人歿玉溪翁又歿前後居喪柴毀支骨氣息憊憊一縷而已既免喪悉謝一切下帷攻苦讀其經術日益高弟子日益進遂以尚書稱大師所至擁臯比正襟危坐陳說經旨旁及漢宋諸儒注疏義的哲乎其言之也先生之教整以峻約諸生跬步必謹啟齒必詳課業必勤說必守洛閩文必規成宏有不率者目攝之則人人愧屈無所容帖括之外譬誨不倦與人子言孝與人弟言恭與富貴言膏粱之毒與少年言輕薄之累則又人人感發以不負先生爲幸于是先生積既廩十餘年數試數躡場屋其學與名不盡酬而伯子以弱冠知名先生盡發所藏書授之遂與先生中分席諸名尙書學者稱大小張矣伯子既試南宮念先生甚不撤棘馳歸而捷書先至先生迎謂伯子曰我先人之有陰德而發聞于孺子幸甚雖然家

乾坤正氣集

卷三百七

世單薄暴顯名孺子卽不至薰灼人政恐人來薰灼耳伯子敬受教刻意爲斂約而先生閉門教授如故伯子請謝遣諸生以輕舫軟輿從湖山游先生哂曰昔馬融首尾東觀不去絳帷吾豈以孺子貴弛壇也先生每念玉溪翁篤老怯寒不能具重裘以爲恨母樂殞于羹竟終身不啜羹及是伯子所進輕甘輒掩泣不忍御矣其孺慕不衰如此年五十四以疾卒于家先生生平行馴尤慎口語絕不談人過或謂其孝謹如萬石君而至于獎訓人倫多所成就則郭有道之徒也始居約時曾爲其姊夫王償貸金報陳氏子舊德弟畜之無所問此二事挾義者所饒爲而先生出于肺腑之餘足多耳其他推己振人皆此類故先生之卒也里巷哀之其又五年戊戌而伯子始對天人制猶墨守學官徘徊南署者十載而始出領廣信郡識者皆推先生淡薄之教云繆子曰余聞之青

嗚人自伯子第而先生色若有憂時愬愬瞻顧曰車少澤乎服少炫乎僕御少進乎門客少雜乎比疾革而后顧伯子曰吾知若之免矣可瞑矣嗚呼先生古之素心人也至心人也方其與伯子同臥起省檜結司履綦如嚴母之衛處女意豈以膏華爲市哉一旦入金閨冠掖庭而猶諄然女貞之戒難矣是故伯子用先生之學顯先生不以伯子之爵尊儼然俎豆稱鄉先賢可也

張先輩傳

邑孝廉張君季成以明經潔行守公車間者三十餘年十上不一第後來之士名齒莫若也士不敢以雁行進輒用唐人例稱之曰先輩顧獨暱愛昌期疾革呼其二子曰世誰相知論吾行者其必屬繆史于是二子以請余不忍負亡友作張先輩傳先輩張氏名修德字季成邑之流璜里人也自其高祖雪蓬處士傳至觀省翁乾坤正氣集

卷三百七

五

慶世世好行其德觀省翁娶于薛憲副女而舉先輩薛憲副者以東越之學聞歿久之祀于學宮所稱畏齋先生甲者也先輩生秀慧性醇謹詳步緩視無佻色薛先生奇愛之曰是兒國器也以從子子妻之先輩感奮日夜肄力于文十七補諸生文益進郡守福清施公號能知文得士每課菽擊節稱善學使太原褚公擢第一當是時嘉隆之舉業腐而輕敏出卽余爲童子亦跳踉焉獨先輩以瞻詞晰理衷其華實醇如也故往往見應格二十八成應天己卯薦庚辰試南宮名在乙榜丙戌奔父喪不成試己丑居母艱壬辰以後則無歲不上辛丑猶在乙榜而時文之變日新先輩不能復改玉矣至癸丑而始憬然曰歸休乎命也夫雖然吾何以酬薛先生鑒而徼半通之綸于先子乃決策就選人方待試而兩目朦朦若青者遂束裝歸歸又二載而悒悒以卒昌期在京聞之泣曰

嗟乎此吾邑之明經潔行真不愧孝廉之稱者而今死矣先輩爲人謹厚方張氏中落里有乘之者先輩旣成名弗問也觀省翁性卞多所不可先輩緩劑之而身自折節遇少年子必衡其禮以是得里人心至其家庭內行有獨至者痛丙戌大故弗躬醫瘞每念嚙指出血歲時饋饗嗚伏地不能起婦亡爲不更婦曰孝己子騫之事可念也季弟天撫其孤庶弟未及于析箸益其授出嫁妹有夫孱子孤者力持其門戶三黨之中待而舉火者不勝數也每歎薛先生之醇學而俎豆尙懸則徧謁紳衿之持論者旣論定而薛氏之後歸先輩力先輩頽赤曰修德直不避親耳俎豆何典而乃以修德故辱俎豆且辱外王父君子趨之昌期曰昔嘗從先輩于有司之庭見先輩少所關說間爲其一二宗黨解誣釋累則媿媿不休以此愧服之嗟乎市道之行也無所爲不居間居間不必

乾坤正氣集

卷三百七

六

宗黨宗黨必有爲有爲必有擇如先輩不居間居間必宗黨宗黨必擇單露擇單露因不避居間難矣哉或曰先輩不必灑然者也如其灑然何以頽唐棘院顛顛選人而其治家課僮僕力田畜斤斤管鑰不纖微漏也此言非是夫制科君制也不得于制科而一階半級君階級也世業親業也修業而息之令子孫有所蔽風雨接衣食亦猶親遺也二者士之經也今有進不走魏闕退不宿菟裘又無鑿坏遁垣之節與銅山金穴之藉而能兩收其贏則何門之抵何謬巧以得之豈可與人爭言者哉且夫先輩亦何必灑然者也文不爭險行不標奇遵君之制食親之遺雍容禮義師表鄉閭如先輩者可以傳矣二子者毓美太學生毓芳郡諸生皆能文章世其家

顧太公者子友戶部郎中顧伯子言之父以伯子貴稱封郎中里人從其家稱則曰顧太公太公年八十六以壽終伯子授狀昌期曰惟子知言父子間百他人筆不知子信昌期謹按狀雜採睹記約其大者立顧太公傳太公諱儒字成憲別號雲竹邑之長涇墅人也祖清父珮世世陰行善公自少有巨人志稍長喜讀書多闇解一日從餘姚諸先生遊盡受其禁方書而解驗之尤深于仲景之傷寒論爲人治寒合色脉察傳變一以膽決行之無不立起人以公爲醫師而長涇人所以推公則以公孝謹立然諾臨財辦不啻以醫故家故貧也坐徭役數廢箸轉徙醫所得糶盡斥以市甘鮮羞其親其餘以給諸兄弟再廢再起築一室聚方書彈琴其中陶陶樂也居久之有子伯子以文鳴諸生問字者屬集公飭丙舍居之治飲食傳餐徹朝暮諸生以公爲家當是時伯子猶以文

乾坤正氣集

卷三百七

七

高困科舉里有與公同起而暴貴者環公官而築之容出入者一竇公數諸衆曰薄人不仁棄舊不義汝冒不祥我又何誅顧謂其家人曰去矣乃卜宅于墅東盡室徙焉伯子遂以是秋舉越三年成進士里人持牛酒賀前偏公者先公遽巡避席謝曰儒懼人之以不祥擬也伯子出入守令曹郎所居官廉公攜酒米之官曰左汝月俸也其治家實不支官中一錢然公獨不諱生產曰吾見豪子官者其家多些窳無以守也故其任筋力課僮奴穿渠壘土接果陂魚日汲汲不暇或告以權利之事則不答出息錢于人噉減其息以田售者寬其值倍等曰令後世子孫從容食吾餘也居身纖苦布衣疏食與田父均歲課所贏班施其宗人與中外之屬其屬疎遠而貧無立者百餘人衣食嫁娶棺殮皆于公需歲大疫修精良藥自齋延門遞給所全活無算他施槥揜輅稱是公雖好行

德而方矩有裁割不爲翁翁烘煖有慝于里者見便訶斥其抗折
貴勢抵宗彊獄獄其言之也聚三族之俊于塾授以一經使無失
職勅勒子弟無鮮衣無怒馬無長夜飲無近市利無接市談輯女
誡數十條每歲時伏臘裹章服拜祖廟子孫巾襴斑其後蘇蘇涕
不收曰痛先人之不及見也初公以醫師名既貴病家惟恐不得
當貧者曰公卽不棄我猝來馬僕飢芻何所具公曰嘻我非封郎
中乃手提藥囊故郎中也若迎我我以一甕子來老人得匕飴少
菜菹足飽矣人乃復爭致公其遠不能致者老幼扶攜謁焉公一
一診治如初人益以此歸公長者所著有簡明醫要若干卷行于
世史氏曰公始居約前後執喪必有聞兄死于盜公被髮窮追盜
盡出伏法家爲破其至性有過人者火延舍賈人百金裝寄焉出
諸餼而畀之不問室嗟乎此造次之事神不及司豈期後日追而
乾坤正氣集 卷三百七

八

數之公子是得天矣自念以布衣起問左再被朝命長子孫慨然
有揭德振華之意焉遠矣哉吾視世之封官非有開先之智裕後
之謀乘時寵光作車上儻高冠大蓋揚揚里巷間而指者已唾其
後此亦人子之耻也公父子免矣徐熙遇道士求飲以一瓠與之
曰君子孫宜以道術救世當得二千石開之乃扁鵲鏡經二卷竟
以醫名子孫貴顯者三世公所遇諸先生其人耶宜祠祀之不忘
也

克菴楊公傳

公楊氏諱漸之字孔儀自署曰克菴子常之無錫人也祖曰温州
倅秋璧公修父曰制藩幕錫峯公廷母曰薛孺人公其仲子也髫
年穎秀便已映帶諸子間尋補諸生卽負諸生聲楊自温州公以
明經發家至公兄弟而聯翩菴苑出入雁行一市目矚而公尤楚

楚整暇絕無少年挑撻之習下帷攻苦寒暑靡輟藩幕公獨心器之先是温州公居官廉四歷郡縣歸無贏橐至藩幕公而家益洗會其守太學上舍久當得官乃決策謁選人而赤手無以治裝公傾私橐以代裝得成行藩幕公需次都下薛孺人遭疾物于家公毀辮狗禮獨身治舍歛秘弗聞于長安邸既藩幕公領冷局久性頗豪倖入無所恣吐納則公裹糧笥金以佐之藩幕公若忘其爲薄宦也蓋始終藩幕公之身送往事居顧內瞻外公之心髓竭而藻理亦稍彫矣其屢不得志于名場以此最後徙業入南雍時公意已倦猶見激賞于司成然卒困京兆試以歸公乃循其髮曰種矣無能爲矣遂裂太學濡不再赴而收身于藥欄花圃間讀書娛性晏息自得至其操管鑰課童僕斤斤如也公旣以節縮治生生事亦不落莫間推其餘以贍里黨之窶者而于同氣尤周悉蓋

乾坤正氣集

卷三百七

九

孝友篤摯其天性也有二子曰標曰栻皆授之經術使並遊太學以發其志意二孫慧而文所以繩督之甚苦曰吾家自臨安府君而下代有間人中葉稍替至温州府君幾振矣然卒憔悴公車徘徊半刺以死錫峰府君之屈首幕僚也吾與若父之曳太學裾也愧非温州府君妻也小子勉之君子謂之楊志公爲人敦氣誼尙簡狎端言雅步少年無敢狎見所遇故人子在落魄之中輒傾身暱就之久與坐貌益恭至若時貴薰灼俗子樞趨公傲然不顧也有密戚而顯者公終歲不恆過卽過竟無所丐晚其矜局自好多如此年七十以疾終繆子曰余從姊室于標得以通家子習公公亦雅嚮余每見輒及古今賢豪忠孝節義事愴慨乎其言之也觸事不平鼻端拂拂火出矣使得階尺寸見于世庶幾彊直自遂不畏高明者哉觀其居家有威儀閨門之內整若朝典猶有先民之

遺焉余是故據標狀參一二所經覩稍節飭傳之亦以荅公嚮云爾如其徵遠有高先生之誌銘在

仰峰王君傳

王生國寵將奉其父仰峰君之喪歸葬于敬亭有馮叅知元成志墓矣余歸自燕而生乃以傳請曰惟吾父流寓江陰非先生筆孰徵者余故奇君沙中之筴感孝子懇惻不忍辭王君名守壘字爾玉別號仰峰其先徽之祁門人也後徙爲寧之旌邑人國朝多顯仕有爲御史大夫曹郎守令者旌人所稱白地王者也君自其小時卽負財用有心計伯氏守諸生君獨不喜爲諸生曰兄讀弟賈賈以佐讀不亦可乎父高峰翁知其才縱之賈游賈輒售累貫至千金而君性廓落好施予輒隨手散盡則且貸且賈且以賈償貸且以貸緩急人意恢如也一日行賈江陰涉江至平寧沙而熟睨乾坤正氣集

卷三百七

十

之曰是足以豪矣聞者拚口謂此間唯有荒葦蔓草恐無所助君豪君曰不然唯人棄所以取也乃決策構廬舍買犢置器擇田而授之三年大墾五年大闢會天幸連得歲稔而沙之趾芽而爲新田者數倍其身畝益拓土益腴鷄犬桑麻居然樂壤矣復請于令立十家法間以意行之如鄉三老故事摘其非良者力護其良而見連者沙民帖然君旣得志于沙中而自喜爲德益甚里有緩急扣君立應其應貸不責子錢多有焚券者有盜婦而矢節或迫焉卒以死殉君收其屍而哭之已麥舟渡江遇盜盜知自君曰此收某烈婦者也竟却棹去于是君義聲隆隆矣而江人以君起流寓擁孤渚羸得暴振則扼腕爭言沙利因數起他事相窘君抗辯數白復行意自如至徭賦踐更一切無所規免橋梁解宇非時繕與縣令以屬君取一切辦使者聞而賢之且有所旌異而君以耗

瘁一疾不起矣君事親孝事兄恭伯氏在則推賈餘以佐讀歿而視伯氏子如子旣推舊業復予新田其至行有如此叅知旣志而復論之曰令天下盛言屯利莫舉行者西北斥鹵連天極塞其人皆仰食飛輓一綫之漕至關國命庚癸之呼時時見告計臣束手浩歎耳使得君數十輩散處塞下何憂軍寔哉史氏曰才難不其然乎叅知之指若云余江人親見君沙中事其起瘠爲饒馴暴爲良翁張鼓舞使沙中人人爲用才也哉卒以益國賦佐緩急縣令倚之如左右手非獨才謂其氣誼足勝之不然而土著之民世上腴積高貴而一遇徵發卽裹頭匿影竄者何多也乃其孝友敦睦均財于兄子抑難矣國寵雋才而循循樽節語必稱親有自哉

先父惕菴府君行狀

嗚呼不孝孤以甲午三月失吾母尙厝淺土未有七尺之封今年乾坤正氣集

卷三百十七

十一

丁酉二月無祿先君再背屈指三年首尾兩殯而又淹恤孤貧中拊身拊棺儉不能傳禮於是不孝孤積愀負恨實倍他人子念卽以身殉地下不得姑強顏偷息甞勉襄事而僭不揣且以千秋累名筆謹濡血狀之吾父姓繆諱炆字明思別號惕菴吾繆之先世居常熟之小山湖橋國初全一處土徙邑之東興里居焉後遂以東興著姓是爲江陰始祖四傳而爲松月翁諱鑑有隱德以詩書教養子孫是生我曾大父怡雲府君諱玉恢奇倜儻喜施予立然諾凜凜有烈丈夫風怡雲翁季子爲我大父東渠府君諱桓少有名學宮一再試應天不利退而修布衣之業其所緩急全活人者甚衆故兩世皆以氣義推於鄉而不失爲長者其訓勅子孫悉有條規一門之內整若朝典大母桑孺人海虞名家女也產三子吾父屬最少生而凝然弱不好弄桑孺人以爲不慧也而少之傳寄

育於李家姑稍長歸就家塾嚴言雅步授之書義多了了時經師趙先生曰而屬曰此子也沉吾愛之異日必爲端士因介於我外祖懷菴夏公以吾母嬪焉會大父業棄其諸生自老而冢氏靜思伯方以才藝起屢冠諸生大父謂吾父吾一經有托而數椽日圯汝盍修業而息諸吾父謹奉命投棄去而任家秉非其志也吾父之治生不耐牙籌讎齷又不屑米鹽瑣尾唯務與吾母折節爲勤儉計一歲中污邪之所入以時消息之與督其力指無虛其食指而已卒以此稍致溫飽無乏絕吾父以少子受丙舍獨畸於伯氏旣家用稍給乃身拾瓦礫編蓬蓽僅免侵於風雨未嘗有所較量傷父兄心繇賦踐更非時至輒獨身跳而往遇所酬費不貲則以私橐佐之一不以聞於大父大父性好客坐上客常滿則吾父能擊鮮具醪以待時時先大父意不必問所與飲也故大父晚頗適

乾坤正氣集

卷三百十七

三

焉且大喜過望動於眉睫曰兒幸如此足娛老人何必雍容衿裾而坐銷我皮肉爲然吾父居恒常悶悶以未究於學自厭及是不孝受句讀稍有旁解吾父乃決任於課責頗招延邑中名士爲之師友而每陰伺其間身自監讀尤計日修短立爲程限東方始曙急披衣起喚阿期醒耶夜則篝燈相守度不盡一日之程不休雖夏蚊嗜膚寒冰帶鬚未爲疲也而當其有所發憤督過卽賓至可卻事至可廢時至可忘寢餐矣吾父廢學早不能博綜於羣書而至闕古今善敗興亡之蹟與儒先身心格要之語時諄諄誦爲不孝莊誦之且特揭其大者於壁間曰以此當孺子座右銘也性嚴冷自持於物情無所追逐每遇世間讎諛謹謹之會力謝不往曰吾以二時侍親三時課子一時料理生事餘隙則鍵一室中澄懷嘿照覺身心無少擾累不亦恬愉自適乎安能與俠邪少年游

浪擲光陰也蓋吾父之斤斤擇地不踰繩尺者垂二十年竟不知世路嶮崎有理外風波事歲丙子大父以高年下世里中豪謂三孤可掇取也不用奇構不得兼於是設外窆以投內隙遂及丁丑家難比主者簡驗情詞絕相左而縣大夫詔安胡公所爲保持甚力主者心益開至爲株究其所以而事端盡白矣時不孝方以童子補諸生父子相攜而叩謝胡公公卻曰吾不忍視良民之就魚肉實非以生故私其父也何謝吾父歸而閉門自省絕口不談前事或挑以搆者主名則不答曰彼豪以危法中我度無得脫者而徼天之幸與二三大夫之明布衣修然以還田井卽我旦暮填溝壑使孺子獲稱於人曰先君子足矣然回視東渠府君舊業已蕩然變斥南山一項多蕪而不治者覺意緒牢落日邑邑無所遣解而其操不孝於學愈急曰匪是無以復先業而償夙望久之多恙

乾坤正氣集

卷三百七

主

居一年輒病病主心脾間勞火炎炎上攻則腸血隨便下不可收又一年肱削而行蹇侵尋成痿不孝謁四方之名醫雜治之卒無效己乃大悟曰吾乃知醫之悞人多而藥之不可以己病也悉謝去不納手書勅不孝吾年及知命患此沉疴真陰耗失豈藥石所能強起惟有息機斷緣差延歲月耳自今以後閫內之事汝母爲政閫外之事汝爲政家事忌惡聲至都勿關聞我我且閉目趺坐在匡床竹簟間銷送白日飾巾待盡而已嗣是十七年之中臥起一榻絕無煩惱道經一函方書數帙或手爇爐香或親潑茗汁羅致四時名花盆盞不乏間與二三老人談往事課陰晴欣然不知錮疾之纏綿也不孝以京兆試不利吾父喟然歎曰吾家自全一處士以後代有隱德而無顯者意將發聞於孺子孺子勉之歲甲午不孝以母憂罷試蓋至是五更大比矣吾父始信遇合有命絕

不以利鈍相繩且曰汝旣不能疾足先登尤當饒菟業高器局以靜觀運會庶進退兩有所據耳嗚呼孰謂不孝血淚未乾重有斯難而尚以諸生送吾父也吾母故以靜恭事吾父至病床十餘年而無躁容迨吾母没而起居多失調者去歲中秋之夕前症忽劇延至今春竟不起吾父蒞不孝輩素嚴疾革之際猶正色危聲不作一悲戀語不孝泣請遺言曰身家事在天身名事在汝吾何囑強爲善而已矣孺子嗚呼痛哉吾父生有至性大父母性亢嚴嗃嗃難事而百方志養終身孺慕如一日前後居兩喪哀毀幾不欲生與澄灣伯同更患難友愛尤篤與靜思伯暮年貧病未嘗不形影相吊也每相見必相泣曰凡今之人莫如兄弟至今我從兄弟輩與不孝藹然一堂矣初寄育於李家姑受襁褓恩後李敗姑老

乾坤正氣集

卷三百七

十四

無嗣吾父迎而養之與吾母推燥分甘疴癢必視沒則厚爲營殯春秋奉祀不衰人皆以吾父之篤報也生平惡麴蘖眼不識盃鎗尤絕閨房窈冶之好客有談他人污媠事者面熟發赤羞汗浹背與吾母白首相莊卽闔門耦坐中相視必以貌方之古人如冀缺梁鴻夫婦真不愧矣天性峭直不以辭色假人常刺刺面詆人過無所諱至使人不能忍拂衣去而退則陰爲覆護曰吾愛之故諍之而忍彰之乎故終其身無背憎人鮮怨者最耻于求人與攀附人見有傾身媚竈者輒揜口笑之曰奉法循理及時供賦吾小人職耳奈何與輦上君子作緣且其人賢不受媚其人不賢不受虛媚何爲者以故終其身無非分之交至遇故舊親朋以貧窶來者無不溫然昵好晚旣篤疾尤強起敘契濶致寒暄或在數十里外題封問訊不絕自少沉默矻矻然如不出口而時發一語輒破

的其論事擬人多引上世難行與性情之所不近者始見以爲左時遠實而遲之數年之後是非成敗叅驗若符人卒服其內鑒大父多施子而吾父苦自節縮大父寬然泛愛而吾父顧矜慎少與以是無一時豪爽名而要其引義裁中不谿刻於大體與二三心知交垂老而愈覺有味大抵吾父渾質有餘而藻飾不足故附於物情者少而依於眞性者多嫻於世法者少而篤於內行者多蓋平居之語不孝曰吾才力量度不當爾祖什一故好事好客卻輸爾祖什九第爲拙爲訥不能爲巧爲利爲慳爲遲不能爲卑爲捷爲拘攣爲木強爲吝嗇不能爲恣肆爲滑賊爲翕張取子惡衣食亦欲稍貽孺子以樸不願其離之者也此吾父之自序云爾而父執之深知者亦曰尊府君德不純師行不表世而惟於偏處完眞

菑坤正氣集

卷三百七

五

癖處養素獨往獨來不要譽於鄉黨朋友殆幾於三代之民歟噫斯言足狀吾父矣惜也一生韋布半世茵褥閭閻於人耳目之間而不孝身名未成又無以顯揚而光大之卽一家庭之行里巷之節幽潛微渺若有若無後世子孫孰從而考焉孤爲此懼乃敢忍死扶服泣請於當世作者之門徼惠片言以信幽珉而光家乘將歿者存者俱不朽矣吾父生於嘉靖丁酉十月初一日卒於萬歷丁酉二月初二日享年六十有一吾母習禮夏氏貢士懷菴公女實有婦範庶幾於范陽盧氏所稱九族宗師者語具海虞趙定宇先生誌中子男二長卽不孝昌期娶赤岸李氏復菴公女太學戒菴公孫女次昌允娶王氏奉川公女女一適縣諸生徐起鳳昌允側室施氏出也不孝卜以今年丁酉十二月初五日辛酉會葬于赤岸里任家橋之新阡而先期勒狀如右

先母夏孺人行狀

嗚呼人孰不有死而獨吾母以憂瘁殞年人亦孰不有大故而獨不孝之於吾母虧半菽之餘歡孤辛累年而溘焉長逝幽恨無窮不孝身負大逆故彌留之際幾不欲生小祥以來僅存殘息每欲強起捉筆銓次其遺事以干作者輒自揣身名未成母以子賤焉用文之惡不敢舉者數四矣轉念吾母一生言爲筭訓行爲闡則令淑之稱在宗族姻黨間者四十年無間卽不能以不孝故有聞也奈何以不孝故終民之是用血淚書狀上有道君子採焉吾母夏氏外祖貢士懷菴公之季女吾祖東渠府君之季婦而吾父之元配也夏於江南爲望族南宋以來代有衣冠人行仁義里人因名其村曰習禮人我明而著者爲承事郎約軒公榮四傳而生貢士懷菴公兼有文章行術卓然名士娶無錫華而生吾母屬最少

乾坤正氣集

卷三百十七

六

生而慧婉端凝不妄笑語懷菴公絕憐愛之爲慎揀其耦時吾祖與懷菴公並以文菴游邑較中相得驩甚乃以間請於公曰吾有季男君有季女兩家男女不當伉儷乎公喜諾遂字焉年十六歸吾父當是時夏氏之業已中微而懷菴公自以諸生硯食不能辦裝故吾母之來衿縗不具而祖母柔孺人性嚴稍卞遇子婦雖得當不廢譙呵聲慮吾母名家女多矜飭故爲非分督過以習吾母吾母愈益恭而加以媮色久乃頗得安居二年祖母卒哭之如禮明年吾祖三析其箸以授世父及吾父炊則吾父最穉弱不堪門戶寄吾母乃椎布操作務以纖勤佐吾父踰年家用小饒壬戌舉不孝又五年舉一妹其先後不孝而舉者有兩兄一弟皆以痘殤故視不孝吐舌懷腕間侷得侷失一飯三哺一夕十起每遇寒暑疾厄則呼天而泣且祝且禳不遺餘力比不孝長就外傳吾父見

稍慧始發憤督課必欲速致於經術頗招延邑中名師誨之而力
詘不能厚脰脩吾母懼師爲有力者所奪實脫簪珥以佐其餽終
不令吾父知也吾祖念不孝疋瘠甚時摩其頂而謂吾父曰此孺
子者孱然耳且人生何可寄緒於一縷不爲旁樹孽乎吾母聞而
心然之遂以侍者進使得比于偏貳丙子庶弟生吾母朝夕覆視
煦煦然如自己出其年吾祖卒吾母哭之一如喪桑孺人明年舉
喪事時吾父方在哀毀中凡內外經紀一切取辦吾母稱易而衷
無何而家難作矣難之起起于里有險人者實乘內隙巧構成之
中以危法吾父素文弱在吾祖宇下久自明農課子外毫不知有
人世機穽事風波乍起闔門震驚所賴吾母堅持內綱潛抵外賄
十指自畫以資吾父橐囊者艱辛萬狀所不忍言會是時不孝以
童子應里選連得首列吾母稍破涕爲歡曰門戶庶有寄矣而郡

乾坤正氣集

卷三百七

七

邑大夫先已廉得吾父寃狀至是力爲湧洗故事端盡嚼而吾父
得完其布衣歸然視東渠府君遺業竟洗然矣吾父曰鬱鬱不懌
以是損心脾腸血下注中虛而外削床臥者十五年未有起色吾
母千方療治筐篋盡傾中間尤爲不孝畢婚爲吾妹畢嫁拮拾拮
据勉強成禮於吾父一無所關聞凡十餘年間吾父得安心筦簞
而無外顧憂者吾母力也吾家世業原不及中人自被難以來膏
腴旣廢斥鹵僅存而吾父沉痾繼之不孝復迂腐不能問生產產
日益挫逋日益起而家人食指猶如故歲時百畝之入十七醫藥
十三衣食卽郡邑大夫直指督學使者所資不孝筆札膏火及所
授弟子束脩不足以支門戶費凡世間所謂脩旨輕溫之奉一無
所致於吾母吾母以衰至之年啖糲衣粗備所不堪絕無難色亦
無諱辭屬己庚之際歲事薦禋家累數十口仰給不贍吾母猶手

調肉汁進吾父其自供則一日三糜雜菜菟蓼佐嚼之取充虛而已不孝每見必泣吾母撫之曰孺子何泣在貧食貧恒耳且吾故食孺子貧孺子未嘗竊自飽也何泣但願孺子積學攻文牖床上老人望卽鼎食不啻矣不孝聞之益酸鼻自恨不能容先是不孝屢蹶場屋吾母意不能無望而猶從容爲慰藉語至辛卯報罷則容色慘淡汎瀾者久之曰吾兩人瞪目以待汝舉久矣而及今不舉卽汝有待我無待也汝第見汝父沈痼久恐爲旦暮之人而不知吾精神已實喪矣一時聞者莫弗泣下吾母念三十年幽憂之思既不能發之於不孝而吾父曰藥裹一床用度不時弟長大棄學又未有授室意忽忽不知所任計欲先其力指以爲食指供則身任機杼與婦子雜作仡仡丙夜不輟不孝跪請倦休則漫應之曰吾直假此以送永日未爲疲也然而勞苦倦極形神兩憊故外

乾坤正氣集

卷三百七

六

氣雖爽而眞氣潛奪已不可復支壬辰秋有毒發於背癸巳夏發於肱皆癘腫作楚投之藥輒愈診者曰其病主在肝脾之間卽治當有後虞不孝已心憂之至八月而病大作其始煩懣穀食少周身流痛醫診之出曰此噎徵也不治將深不孝驚且泣以告曰吾自病血耗耳度不至是然猶手操葦蕤鑰衡量米鹽出入調膳進吾父至十月小間十二月而忽劇亦未嘗竟日貼臥甲午元日猶力疾早起髻而端坐受家人朔肅如也是歲大比郡邑當錄士上督學不孝見醫言稍驗意不欲就縣試吾母顧促之行曰吾聞病噎者不受食今受食非噎也汝不試予滋懣不孝重違母心強就試比試歸而吾母已晝寢飲食不盡受操藥進之亦輒逆此正月二十日也不孝與吾妹若婦日抱首而泣吾母止之曰命也自吾十六爲汝家婦送二老人哭三殤庇一婿一嫁兩年遇患難十五

年事病夫未嘗一日享開眉卮而非時憂慮外家哭泣不在其中
生非金石安得不死死等耳欲緩須臾以諗汝秋試而竟不可待
然固命也但念汝父未起汝子姓漸繁以爲汝俯仰累耳孺子勉
之失時無喪業得時無喪心卽吾在溝壑之中有餘享矣又嚮吾
婦諄諄囑付頗及門內諸細事皆宜家善後語尤不忍聞命理巾
服及絞給飯含之具皆手自經涉必如其指而後肯然度之於制
鮮不合者自是粒絕不可復進至三月二日召諸孫于前以示不
孝曰雖貧無棄之學因亟呼盤水來使不孝掖而盥手足猶命取
裙帷自蔽曰吾當以詰朝逝矣越一夕竟逝嗚呼痛哉旣逝之明
日將歛猶若視不可含者吾妹憑而哭之曰母以吾父之未離於
褥也而吾兄之未離於衿也送往事居勉圖令聞是唯吾兄乃瞑
受含嗚呼痛哉吾母生於嘉靖辛丑七月廿三日歿於萬歷甲午

乾坤正氣集

卷三百七

九

三月初三日春秋僅五十四耳使不孝能讀書成文章早致身於
科第則吾母當雍容食報以盡其年不然而能服耒耜闢草萊或
販賣什一得稍贏餘以具朝夕歲時上壽娛然相樂則吾母何至
以其骨爲勞薪之爨而今己已矣不可復贖此不孝所以仰天椎
心氣盡而不欲復返者也吾母有令儀好簡潔雖終其身不識有
綺紈之御而就所服疏布單衣練裙竟敝不容一點染遇稍點亦
必付浣濯不至再不休其所食雖至粗糲度非潔清亦不肯下一
匕箸生平最慎履綦終歲不聞闕外其接見妯娌娣姪皆雍雍詳
矩而莊故見者牽遙望而矜爲整卽長年均行不敢以褻見其治
家尤精警善肅括家人大小廩廩不敢以欺惰進然必伺吾父之
嚮而劑其偏父意所急故縱之父意所緩故操之要以相御而行
輔所不足故卒亦未嘗有內拉名至於通大義引大節煥煥懿美

有可傳者吾父自少育于李氏姑受襁褓後李敗姑老而吾父
迎養於家吾母推燥分甘疴癢必視沒則營窳宥奉春秋里人多
難之吾祖所遺筮非一而有屬養於仲氏者吾母兼任養之尤加
禮曰昔以巾櫛事先舅敢暴使乎懷菴公之下世也吾舅氏仁而
弱晚棄其諸生而家益窶吾母己身在窶中而猶力爲周贍歲時
遣問不絕比疾革之時猶呼不孝割產相遺曰以志別也舅氏臨
其喪絕痛後五月竟坳其撫不孝輩雖慈必教以義方一言之誤
一趾之錯卽斷斷督數使之毛立汗下乃己晚年雖急不孝成名
而其居恒誨教必先禮義而後富貴不孝每從外來稱說當世通
人高士某某母欣然聽之無倦曰兒異日者庶幾是乎今得爲之
執鞭否至語世俗榮華高車大馬鮮衣腴食揚揚得意狀搖手勿
道也嗚呼此亦足以觀吾母矣吾父諱炷字明思吾母白首莊事

乾坤正氣集

卷三百十七

序

卽闔門耦坐中相視必以貌識者至方之古人如冀缺梁鴻夫婦
云不孝昌期將謀葬于赤岸里任家橋之新阡而卜日未吉復恐
暴露滋戾乃以今年乙未十二月初四日忍死扶柩權厝其旁奉
父命也不孝因憶往事之酸辛展遺言之慘怛循題想象則風軌
凜然扣几尋聲而提撕若朗竟不知不孝所以報先德而酬冥志
者當何日也嗚呼名非文不傳文非人曷重不孝卽自劣劣無聞
亦何忍鹵莽湮滅使吾母闇弗耀於泉壤乃敢畧記所知粗陳梗
概弗藻弗飾以仰請于達孝仁人大宏錫類薄採幽潛志其什一
而銘之則吾母死不朽不孝死亦不朽不勝哀懇迫切之至

右兩狀係先嚴守諸生時筆也當先大父母入土曾請趙文毅
公及王澹生先生誌矣後通朝籍復以合誌請於福清葉少師
少師諾而未成文也逆璫煽禍追奪之旨肆出先大父母二贈

俱不免故先嚴之自序有曰二誌俱未勒石冀他日贈典稍進
得聞我二人之幽不謂逢天之譴并奪二贈此不孝之死不瞑
目也既入檻車又與執友書云弟父母二誌尙未入土諸生時
草狀亦多可商者異日暇時令小兒以二誌懇求一表又同胞
一妹極孝於親可帶一筆于後地下之感也書訖付 虛白 手涕
淚俱下聖明御極優恤慘死追及二世先大父得贈通議大夫
詹事府詹事先大母得贈淑人兩狀仍存舊稿傳示子孫使先
世梗概得有所考云 男虛白百拜謹志

徐節婦王孺人行狀

節婦王孺人十七歲而孀五十歲而完節著幾六十歲而聞於天
子詔旌其廬爲故民徐大昌妻王氏貞節之門於是邑人稱徐節
婦云節婦歿之又明年而其嗣鑑將謀所以襄大事者先期過不
乾坤正氣集 卷三百七

三

佞屬序狀問誰銘曰孤不肖賤且貧將以吾母累他顯人則不任
抑以他顯人累吾母則不敢庶幾得天下之賢有節者一言文其
骨乎雖然非子狀莫爲導也敢請乃狀之孺人姓王氏居東常里
爲江陰名族父曰希祖翁娶習禮夏而生孺人孺人生而婉嫻端
疑不妄言笑授以孝經列女傳諸書輒心解十六歲歸徐季子大
昌則能莊事其夫不爲貌舅近閒翁姑錢孺人並賢而禮之居一
歲而季子有篤疾則日夜籲天請代竟不起時孺人已姪數月矣
伏屍哭極哀曰天乎未亡人所不卽從夫君地下者唯是茫茫一
縷之緒而庸可幾乎蓋頻絕復蘇者久之乃自剪爪髮納諸棺中
曰以志殉也已而免身竟得女孺人痛楚益甚曰吾不死豈爲他
家抱媳婦耶意忽忽不欲生姑錢覺而伺其間夜則篝燈相守達
曙不滅且所爲婉譬百方曰而不幸不生男此孩抱間物亦而夫

遺也孺人稍稍定強起爲季子營葬事一身自經紀且穿雙穴以待其矢志如此亾何而姑錢歿孺人哀毀不勝已復自念笄年一髮姑死疇與共朝夕者而坐令四面圍而薄我義不可留遂決策就東常母氏棲焉亾何而遺腹一女亦竟以瘞殤矣當是時孺人春秋僅二十九耳或謂孺人之始念無他以有愛女在女死而孺人之望絕不能無生得失而孺人意益堅輒請于伯氏江涯立其仲子爲嗣卽所謂鑑者也先是季子早世近聞翁已析箸夷于伯仲二子而僅以什一授孺人供孺人意恬如也至是而爲鑑致塾師締姻氏所費頗不貲皆自孺人躬篋勸絀組以出之一不以聞于伯氏曰但得此子成立使春秋無廢祀死者有馮依吾卽死不恨矣鑑旣長成婚志意猶若未立頗從俠邪間游不問家人生產孺人泣而數之曰未亾人二十年來早夜拮据者爲誰乎而生

乾坤正氣集

卷三百十七

三

若此吾不如早辭人間與而翁合于地下鑑大感悟始束身就簡柙孺人不勝喜乃出其力指所贏佐以簪珥稍爲鑑拓本業遂有宅一區田百畝曰吾事畢矣悉推其家事授子婦而閉坐一室懸夫像于壁晨夕瞻禮時嗚嗚泣數行下其憂思慘怛猶不減喪季子初年於是孺人年五十矣邑諸生父老先後列徐節婦狀上邑父母麻城劉公詔安胡公胡公尤好風勵則手削公移數千言上部使者使者覽之色動立下檄獎之復遣邑吏具粟帛往致其家自是使者行部至邑輒修故事褒禮孺人有加萬厯十四年御史南城鄧公煉以孺人名列疏上請得報可勅下有司就其家豎建牌坊以示永永蓋異數也而孺人年已五十六矣中外宗黨群趨賀之顧孺人色焦然不自得也曰吾一里巷婦得以區區之守上徹于九闈而費縣官金錢爲楣榜豈不踰分過當哉且吾以髮見

節以節得名惴惴焉無以見夫君子于地下而何敢聞賀識者聞而
避之然嗣是守令監司使者聞孺人名益加禮歲時存問不絕里
中農夫饁婦莫不慕說徐節婦矣蓋孺人受旌之九年而以疾卒
享年六十五邇其幾時則已四十八年而遙如一日也可不謂真
完節哉國家以禮義風天下歲遣直指周行民間各廉其所部有
忠孝節義名寔副者以聞至大典也道衰俗薄勢利爲梗旌者不
必節而節者不必旌其甚也至以幽閨白髮茹荼含苦之危節而
反資淫門妖冶蓋醜匿污之僞號亦寃矣夫以徐節婦之力無纖
毫可自致于時者幸所遇一時良有司名執法搜幽剔遐使不汶
汶于當年天之所以報孺人可知也孺人之母夏孺人吾先母姑
也於中表姊妹中雅與吾母契善而吾母生平對子婦每好引古
今節孝之事以相戒勉故予所聞孺人之行爲獨詳吾母嘗言孺

乾坤正氣集

卷三百十七

五

人居恒衣不釋縞食不重葷足不履闕外其刻意如此又言孺人
之始發也或撼之或咻之或擠之忌美樂垢寔煩有徒欲自引決
者數矣比其退棲東常而會其母家方饒盛又其兄遜休君輩皆
勤修好善每事曲成其指故孺人卒能撫有其嗣以致成立繇此
觀之節婦之難蓋十倍男子矣使孺人不遇難節亦不顯然以求
之王氏抑何多賢也吾母少孺人可十歲雖終其身幸無人倫之
難而一生艱辛剗刻自見殊不減于孺人記吾母病且革猶呼不
孝問王氏姨無恙迨吾母見背三月而孺人亦報逝矣嗟乎此昌
期之所以執筆論次轉念吾母而咽喉無文者也墓在白渚港石
橋之祖塋與季子合焉禮也嗣子鑑娶吾舅邑諸生夏安吾公女
吾外祖貢士懷菴公孫女有孝行以哭孺人傷毀踰一年亦卒予
小子憶先慈之遺論欽徽範之可傳爰受其嗣世系生卒子姓具

狀如右埃有道君子採焉

祭外舅李復菴公文

外舅赤岸李翁以疾終于正寢子壻昌期方有事郡城聞訃之夕飛棹還犇溽暑見迫含殮弗待憑棺一慟肝腸欲碎越日癸亥七方始乃具時羞之奠牽婦率子酌酒于翁靈而告之曰嗚呼閔予小子遭家弗晏甫麗青衿父寢牀薦門戶稠遲再緇菟戰里兒魚然侮予單露僂行泥首薄言往愬恃有翁在以爲外護甲午喪母丁酉喪父兩殯纍纍拮据穿墓恃有翁在以爲外府期婦多育哺乳爲艱翁抱季女含飴膝前一日出外必袖珍還女病而啼翁亦淚潛婦曰女歸無累老人翁曰我在有含欲申昔汝于歸矜禱不紉用祖代父于我乎嬪世眼茈茈笑我嶽嶽妄意高飛候馬生角翁曰快婿定其騰蹕庚秋小獲翁眼一濯如何不才乍鳴隨際乾坤正氣集卷三百七

五

昨冬偕計翁病侵尋送之毘陵有涕沾襟忍死一捷寂無好音狼狽歸來握手勞苦日子有待我將就土其語喃喃若塞若吐其行圍圍或蹇或仆曾不三月而翁去我我負我翁負翁望我嗚呼哀哉人之愛婿自其恒情翁情獨鍾比于所生視諸外孫亦復非外織奇必獎小過是忘虛純二子章縫並列翁喜而狂逢人便說嗚呼翁望期父子而豈其止此期所以矢報翁者卻又非青紫來日寬餘翁不可起我真負翁翁目猶視嗚呼哀哉惟翁生平直腸快吻掇皮皆眞衝口無隱洒落乾淨其神也全有如佛說此往生天况也爲德不可殫傳文字而賢食報已先孫枝方茂後祿必駢翁日可暝我自悲纏嗚呼哀哉尙饗

祭蔣母薛孺人文

蔣母薛孺人以疾終于寢宗黨出涕老幼悲纏蓋孺人之盛德感

之也其姻生繆某自燕山下第初歸倉皇走奠不及侑以一辭至今年之十二月靈輻將發乃以先期十八日戊午再修薄祭而爲文以告之曰吾聞文繇情生情繇哀述若乃婚姻兩家母夫人之戚堂幃素隔內外迥邈哀旣無從情何緣起然則世俗悲誅痛晚之文雖賦辭酸楚申義悽惻要皆浮綴附麗取慤生顏爾不佞獨於孺人有真哀焉曷哀乎孺人代吾女哀也惟不佞與孺人之夫君歛吾丈初以文字相慕嚮遂以婚姻相盟約不腆弱息出奉箕箒孱然清羸不任井曰城鄉相去百里而遙自女入門而孺人推燥分甘用姑代母使內子忘西顧之憂弱息無肥泉之歎其誰恃耶癸卯之冬不佞與歛吾丈將戒裝北上女以產厄幾殆孺人百方療治靡神不禱不醫不致不佞與女割別見女氣息啜然呼吸之際一縷而已醫者謂我第往無虞然決能舍然而就道者其誰

乾坤正氣集

卷三百七

五

恃耶比不佞與歛吾丈共守公車心忽忽靡寧惟恐吾女之有不測也後家訊南來女幸無恙故下第之晨兩人沽酒燕市一賀再得新婦一賀再得女郎破涕爲歡聊以相解嗚呼孰謂病者得蘇而護病者反不起耶女爲吾言病危之際婆合掌跪於榻前曰天道吾婦吾請身代嗚呼豈爾年蔣氏閨中宜有咎不中於婦卒中於姑耶抑孺人鍾情之極精意通天請代得代耶不然以孺人之一敬不違四德咸備宜享而何不盡享也以孺人之拮据動勦夙夜興寐是尙未一享而何竟不享也不佞謂吾女汝姑代汝死汝不得獨生卽不生重傷汝姑心以報爲孝竭力婦事而已謂吾婿汝母代汝妻死汝不得獨生卽不生重傷汝母心以報爲孝竭力男事而已歛吾丈以詩禮勞儉刑家者也渠自能教子若婦不佞所以提女若壻者以此要以荅孺人之志云爾雖然以孺人之聖

善不享於生前必大享於身後夫婦從夫爵歛吾丈已饒爲婦人
辦之母以子貴則吾壻勉乎哉不佞於孺人不勝兒女休戚之關
與生死存亡之感故弗倫弗韻之辭不覺縷縷吐於筆端倘休明
之不味其聽然而肯余言嗚呼尙饗

祭顧朗仲年兄文

萬曆丁未十月廿一日朗仲顧年兄以疾卒於家友弟某適以問
病至憑棺哭之還家忽忽多病至改歲戊申正月九日乃獲操篋
雞斗酒沃於靈前而告曰嗚呼朗仲一往長已曾幾何時歲已更
始虞山歛翠向湖渴水雨雪雰雰菴誰倚吾哭吾私失吾知己
淚眼欲枯泚筆告子自子年少人號清狂余亦癡絕跌宕詞場百
里心期若得一當丙申之歲乍會吳閭子讀余文喜而若颺比及
於庚同齒於鄉頡頏公車周旋菰戰相子之質精金百鍊相子之

乾坤正氣集

卷三百七

三

神寒冰一片余旣嚮邇子亦縉戀從容申欵肝腸洞見白水青松
永矢勿變子言投我眼皖好音我言投子如蘭斯馨子有微瑕爲
我投襍我有隱慝待子規箴藤谿對榻梅谿連衾疑交譽義兩兩
沉吟惟子讀書鉤深九淵余不盡解子謂忘筌惟子爲文月脇欲
穿子聊涉筆子謂便娟惟子操行玉潔珠圓子小出入子謂無愆
嗚呼自有宇宙自有朋友管鮑在前范張在後及吾兩人如左右
手非以狎暱黽勉不朽進或輦轂退或巖藪出處語默同心白首
子未白首藏於區區吾齒又先可問前途豈無儕偶疇鼓疇桴豈
無少雋衰鳳怯雛悠悠世情誰與爲徒追記賞心載號載呼子有
微言世道交喪俗人勿問雅人安訪笑彼妾婦馮人俯仰吾用吾
法不依榜樣持世出世證於太上聞者大驚我知非誑子視世爵
蝸角飛塵誦詩讀書意薄青旻所以僕僕詎甘勞薪鸞翮時鍛龍

性難馴腹笥經濟未洽隱淪杞憂婆恤無路披陳頂戴南還脩髯
半雪顧我諄諄精華銷竭女堪一往吾始決絕渡江勞歌楚聲慘
咽何地可灑一腔熱血不謂新語將成永訣嗚呼爾其流連酒德
宛轉琴緒伸毫理詠翻墨染楮攀險搜奇窮日繼炬人之見之風
流豪舉別有苦心孰可告語所可告語三三好侶蓋棺既定物譽
騰喧諸子述德謀上輶軒制府嗟悼遺賻到門書生好事莫不來
奔其骨雖朽其名已尊老母寡妻上有金昆嗚呼何人不死子死
亦得知己之痛曷其有極子之幼子吾許弱息大者龍種未就啣
勒輔之翼之後死之責言不盡此悲纏意嗇嗚呼哀哉

夏門雙節婦夏侯氏王氏紀畧

夏子時亨余辛酉楚闈所舉士也其爲人清挺穎秀知非凡士壬
戌連第去時同榜旅謁者人人無不意自得獨時亨若有愀然之

乾坤正氣集

卷三百十七

七

色余私問故生俛而不能答一日肅衣冠再拜與之坐泣而言曰
時亨少遭閔凶伶仃孤苦祖父俱早喪微祖母無以有吾父微繼
母無以有時亨夏氏一線實兩孀母延之以至今也祖母夏侯氏
孝感縣人適余祖年二十七祖棄世哭而嘔血以頭觸棺日夜抱
吾父而哭曰天乎吾乃愛旦夕命哉恐孺子之顛躓無以報地下
耳移棺寢室忍死靡他日夜齋吾父俾有成立吾父得補諸生娶
嫡母母前卒繼母王氏居無何吾父又卒母雉經者數四祖母扶
抱叫呼乃蘇于是仰天重歎泣曰吾有姑在我死姑何依復顧時
亨曰爾非吾出也然吾夫子卽吾子也我死子何恃于是侍祖母
益恭謹甘苦必共相倚爲命而課時亨誦讀益勤膏火之費皆以
十指佐之茹荼集蓼備所不堪絕無難色或勸之改操母不應斷
髮破面堅拒之且撫且誨待亨如一日視姑猶母而子猶子也祖

母夏侯氏疾革母哭之慟病骨立亦遂亡夏氏兩世孀母一五十年一十五年寄一錢于時亨日夜歎其有建立而皆不逮時亨之有今日也可不痛哉言訖時亨聲淚迸下復踞而請曰願邀夫子片言以彰不朽則時亨死不恨矣余既欽兩母之節行重傷孝子之志也許爲立傳卒卒未果遷延時日忽逢瑞禍勒罷還里罪將不測終恐負諸聊述時亨之言紀其事以待他日嗟乎婦道也臣道也男子之夫君也今之男子二心于夫者多矣豈復知有婦道耶兩母一行以事其夫時亨貞心以事其主以愧黷異辭耻之習是編形管而標青史者萃于一門也當兩母熒熒靡依冰操凜然寧能必其子有今日然卒以此揚名于後固在立志哉乙丑冬日書于松窗

乾坤正氣集

卷三百七

天

從野堂存稿卷五

明繆昌期著

涇縣潘錫思校

寄馮琢菴師 以下係續補

故少宰趙定宇先生精忠大節天下莫不聞前撫按以郵典請僅得祭葬而贈官易名竟爲忌者所格君子惜之然皆曰有待所謂待者非待久定之公論待主持公論之人也今老師而旣掌邦禮矣於是吳中之賢搢紳在朝如王銓部澹生在野如顧銓部涇陽等皆諷其家使早從事勿致後時此公之冢子太學生琦美竭蹶三千里而改就北試者將有請也竊以爲特典斷自朝廷條議關之言語卽老師豈肯以館閣之舊參一毫私意於其間況菰蘆賤土何敢妄贊一詞區區此心不過以諸君子夙鬱不舒之公論與少宰公沒齒未伸之浩氣欲老師一宣暢之耳琦美博雅能文章

乾坤正氣集 卷三百六

一

一登龍門自遇賞識其乞恩就試兩事倘老師垂念賢者之後稍爲拂拭則少宰公當加額於九原矣某受少宰公知自其久困諸生時卽有婚姻之托以爲老師之知某猶少宰也敢以少宰之身後與允子爲請其濟不濟則天也罪不罪則老師也某何知焉

與王澹生

自門下之柄用也不肖已爲林下諸賢占一陽之復曾幾何時而德機潛轉精采頓新稍引用一二名流淹郵在下者已保持一二循吏醇悶見屈者而後君子喜小人懼曰是將拔茅彙征而射隼於高墉者也賢者作用固不可測哉雖然銓地之不得其職於今十餘年所矣其始部與閣相齟齬而中人乘之今則司於司相抵而言路乘之夫部與閣相齟齬有名也司與司相抵何名也使中人乘之猶可解也使言路乘之何解也故今之君子皆望門下爲陸

平湖爲孫姚江僕謂門下之爲平湖姚江不難但今日之時事更
有難於趙高邑顧梁溪耳何也高邑梁溪之時名立而功猶待于
後門下之時功立而名適符于先意惟苦心調劑而不失其正方
有賴乎今冬計典朝堂當必借重於門下幸門下以身任之不肖
尙藿食何知天下事竊見邇年以來廷臣之氣漸銷漸靡所不愛
死力與中使爭赤子之命者皆外吏勞耳就中稍示激揚陰加培
植布置中外脫將來萬有一虞討得許多氣力蓋今天下亂本在
內亂形在外惟明公世篤忠猷勤勞王室知必有槩於中也至吳
中邑里日見蕭條而不腆敝邑樵悴特甚倘門下留念桑梓于令
君遷擢之後擇一長厚廉潔者居之庶使我輩漁樵得穩耳不肖
年邁猶屈首公車間以需一割實有慕於陳同甫之人而恃門下
爲葉永嘉故不覺其狂言之疊疊若夫敘寒暄上起居以爲塵大
乾坤正氣集 卷三十八

二

雅而不敢及焉餘情具別楮

又

趙少宰公之歿垂八年矣而未以易其名天子推恩大臣三品
未考滿者皆補蔭一子而公之冢子尙未得請門下得無念乎元
度兄之改轍而北實諸君子從臾之以門下方當國事倡公論是
渠父子千載一時不可失耳然元度猶逡巡自却蓋以昔年曾負
大譴於門下心實無他而悠悠之談無繇別白縱王先生長者不
誅絕我何顏以請於王先生不肖曰不然王先生自任以天下
之重方日汲汲乎獎護名教激昂是非而何掛乎夙昔之小嫌且
子之先少宰邦之遺直也子少宰之遺允也王先生以邦國故而
念少宰以少宰故而念子卽微子之謁之固知王先生之將有樹
於趙也於是元度乃趨裝北上蓋不肖亦微有贊決云此兄自多

難以後磨煉工深文章器行日進不休門下一見自當刮目相待矣竊謂易名一節子孫既不得自乞必須言路條陳而閣部力主乃可若非門下撥動機括則不燃之灰誰肯念之請蔭則看近例應否耳百凡行止俱聽指揮更望門下垂情世好曲賜盼矚不惟少宰公加額於地下卽先尙書亦當點頭於天上也總恃氣誼不嫌饒舌惟門下矜察幸甚

與顧涇陽

公車之末蒙先生拳拳注望又得借寵靈於李中丞修老爲惠修矣鍛羽而南不得一報先生國士之知引鏡窺形何施面目竊聞修老之論天下氣節之士莫弗以東林爲東山恨不且晚得大賢之用而龍臥不起密雲自如若天意止以明道淑人之權付之先生者抑雲雨之施有所待也東漢南宋之事某不肖感歎于中者乾坤正氣集

卷三百六

三

久矣河清旣不可俟若互相標榜亦豈士君子之幸哉抵家忽忽無賴尙未及親叩里第率爾附陳惟先生恕其狂瞽幸甚

寄胡葵翁老師

伏審老師祥琴已御道體安和不勝遙慰弟落魄門人伏處東海不能于數千里外承起居眠食之詳每一念至恍然若失去春將出都有一緘報謝兼附薄奠于先太公緘中頗悉情事爾時令親惺子丈行藏未定竟不知何時得達左右也自不肖公車歸長安棋局又一變矣前所憶測偶符一二今未可便議出處時也適與袁方伯晤我言之地方人才一着出與處斷不可少有方伯公在此其機乎老師才畧識量自是國家有用人故海內識者頗以不盡其用爲恨若以老師之履道坦坦何所不得遙想今日山中擁書萬卷以當百城藥欄花砌以當部署既有令子又有文孫永日

無事點定課業每奏一篇作一日喜此光景大不易得老師自當領畧耳不肖近狀如昨髮短心長尙時作廉將軍披甲上馬狀蓋經生業有何滋味而知己之恩終不可不報耳

與門生汪如石

燕中分手正如飛鳥離群不知去嚮然途際驚弓之危與還家投林之喜同病相憐何日不念小僮兩到吳門皆自以賀書故僕不及知故無一字之寄據云從者尙未抵家甚爲驚疑家太質每從旁慰我未有此人而有他厄者也後一訊云已抵家矣則僮僕皆爲色喜然抵家之期至今尙未知也途中安穩何以遲遲至于抵家之後百孔千瘡室人交謫此又爾我同病不待足下之告我矣目下有館可以靜坐者乎有生徒來從可以少資膏火者乎鴻漸諸子時時過從乎闔家人口無恙乎錢受之一朝突兀亦足下同

乾坤正氣集

卷三百八

四

藉之光可喜也而蟻附蠅趨之輩醜態百出不知貴者自貴何與彼事祇益賤耳今歲十八房京本多未齊而刻者紛紛坊間射利何所不至足下曾看得兩三房好者否有好窗稿兩三部否近日聞錢受之寄到拂水社中有王帶如一部此奇寶也但落諸君手意見不同未免遺失此君天才卓悟不蹈人間一塵所謂散髮亂頭皆好者韓會元稿論本等亦舉業之當行者第其筆姿光映正是金華殿中人耳從友人處見京中的本廿七義係湯藿林批評者而未竟刻藿林好以已見裝點人文亦不足據也我輩用工正不必看遍三百人亦不必看遍諸名家須從八處求之覺有進處便是耳我已陳人誓不談舉業于少年之前偶爲兒輩言之并以告足下切勿資人笑柄也生八月中擬過吳門不知得如此願否卽我不在子寧不來總于此時當覓一會耳前所寄書籍恐途由

不免搬運之煩意甚不安今可照書目一一簡歸

寄詔安胡世兄

曩歲六月中得先師無祿之耗設位慟哭形神慘淡幾不自持愛我者強慰之曰徒傷無益公之望子也亟子不第公目不瞑胡不一戰以報公志於是不肖拭面收淚再理公車曰必報知有死無二而今乃有以告師靈也并慰世兄足下三世兄之函覲先自游君來而弟未有言弔於先師也非忽也以有待也今也屬事之殷尙未有寫哀之辭附奏于靈几也非畧也更有待也嗟乎師何負於國而使之齋志海濱以歿師何負於鄉而爲里中豪右乘喪思逞刀俎此真三世兄臥薪嘗膽之日而不肖所以報效知己之秋也恨始進輕微尙不足有無耳雖然惟力是視敢不夙夜會舍親袁左伯已爲門下致感且祈後花渠無不用意者但忍居閩之日乾坤正氣集

卷三百六

五

短耳新詔安公已面囑之不肖於此公素昧生平一見知爲長者必不負諾也弟在此中凡于貴地方官長有一綫之路自當爲地惟是世兄慎重自愛家庭之內尤宜協力同心外禦其侮讀禮之暇懋勉大業以酬先師未究之志不任拳拳方待詔闕庭匆匆勤此附湯惺予丈報謝衷懷所托百未盡一嗣此南翔有便圖再布耳不腆之奠聊代炙鷄絮酒非敢薄也亦有待也世兄閱此紙畢卽焚于靈几曰繆生訊到矣期以異日籍手王程修千里生芻拜知已于壠下

與蕭如城

先師胡青州身後之事荷年兄留神護持其波及師門者猶弟之身受也惟是彼中土俗獯獯至以殺掠爲恒事擄人無禁奪人無忌藐爾諸孤身名未就其誰能捍之賴先師生平處厚土交易清楚

故祇以貼絕爲名前此紛紛斷給不知衆壑難填刁風易熾此風不戢遂有窮兇極惡之徒入其室家毀其靈几凡有血氣莫不傷心況乎不肖弟者受吾師國士之知感恩圖報三十年于茲矣青松白水有如皎日今不肖弟偶濫清華而適聞其堂構冷灰子孫塗炭此荆卿所以刎頸而豫讓所以漆身也幸而仁人君子如年兄者在事必能博訪摛紳知吾師生前之偉義上不負朝廷下不負鄉曲祇以仁暴攸分共處里閭貽此禍端可以此情上達監司下告守令重懲一二杜絕將來是天所以惠吾師而不棄其孤也方師存日諸孤日擦不律弄柔翰孱然文弱不聞戶外何事今日與無賴喪耻之徒囂雜詬誶蓬首公庭俯面隸卒弟每一念之涕淚如雨謹齋心削牘南向稽首而告之伏祈留神省覽

寄麟翁錢老師

乾坤正氣集

卷三百十八

六

自騶馭南發昌期以隸館方新不及追隨絳帳瞻望靡及神與俱馳伏惟老師初抵里門旋晉官案不廢西清之班少循南陔之養錦衣黃髮照耀一堂誠人世之極榮天倫之最盛也辱在門墻忤無何已乃羈守館下一价之使與咫尺之書兩俱缺然某死罪惟不肖遇合雖晚敬榮甚侈蓋古人以不出大賢之門是懼而某幸得之老師提掖獎借不遺餘力當行李匆匆之日猶貽書勸勉矐乎有深寄焉愧不肖非其質也憶某少小迂狂蹉跎一第志長而力短識具而精銷且奈何昔子瞻之謝歐公謂願得長在下風使區區之心常有所發自老師暫違承明而不肖之心久無所發矣惟是讀書厲志之外不敢他有所及以負老師然以疎性而處風塵之會以過時而陪年少之游揆之人地多所不安幸老師復不靳以末光振之以餘緒開之某雖不敏請從事焉臨楮不勝惶恐

答趙文度

不肖晚來一遇有慙面目乃二三知己彈冠之喜政以其晚而倍之如仁丈其一也客夏曾一奉報章會通籍匆匆哀懷未悉仁丈不以爲疎更辱函貺懇懇有加此誼不可得之今人也別諭肺腑之托苟可爲地敢不殫心惟是不肖處多畏之地而吾黨值緣慳之日躊躇者久之容與大洪父母商確思得當以報也

與胡 年伯

自老年伯出都門尙幸有孩抱之一綫以爲仁者有後善人可勉而冬杪忽有異耗論之果真也何造物者之毒人而顛倒人乎已矣勿復言矣每欲奏一訊奉起居以當千里執手然臨筆而輒廢者屢矣蓋心所傷悼所不必言傳若達觀曠覽以保餘年知老伯乾坤正氣集 卷三百六 七

已饒能之如其不能卽百方解譬亦無益也乃卓兄去病書來盛稱老伯之達于觀化且達于處家極爲欣慰乃吾年兄之俎豆亦見公道在人 不盡泯滅千秋萬年清芬不墜賴有此耳此皆李直指之主持而禹門季侯兩年兄贊助不少不肖與二兄往來書牘頗以此事屬之兩年兄言老伯情事亦娓娓真摯也不肖所從史于諸兄弟者亦不必使他人知與老伯聞耳

復觀翁徐老師

捧讀函教知先太老師已掩玉名山隧道麗牲之銘昭揭不朽是唯老師純孝格天榮哀畢具其于子道已伸矣移而之忠此其出而雍容表著挽回未運潛轉元神之日也且老師之爲水鏡爲素絲凡長安道上有耳有目者無不知之今日者公論大伸物情趨仰時乎時乎昌期在門弟子中最拙劣最遲暮造物者又驅而束

之於空虛之署筆札之守無能開口向人吐一寸氣雖然心不敢
味氣不敢忘每與二三知己商之要爲國家急老師耳豈以門牆
之私誼哉原擬冬中走价奉候山中而竟爲翰貶所先皇愧欲死
藉手報章兼附一縷之敬知我者師定在鑒宥不宣

答張紹和

長安看花不借足下意忽忽不樂署中無大詞盟又覺瀛洲亭畔
草深一丈也弟愧先驅矣展誦遠函知足下托寄甚深弟精已銷
亡何能爲役且館規束人以日爲歲明年散官便料理行裝作三
徑歸人矣歸而築舍一間擁書千卷庶不負知己者之相期也

答趙文度

比聞郎君翩翩鵲起與大洪給諫言不禁踴躍非以一子衿足喜
喜門下青箱有托因之干丹霄而拂青冥增光祖烈卽大洪亦同
乾坤正氣集卷三百六十八
八
此遙矚也仁丈高才夙鬱會應發舒洗耳捷音在頃刻間矣望公
車早發爲長安襪被之懼也

與孔玉橫

政欲拂拭一觴寄折柳之思不謂明日遂行矣如此落落通家兄
弟之謂何台丈骨相自是金門客瞬息三年便當冠冕天下不肖
弟敬執鞭弭望屬車之後塵矣一函寄伯兄并老年伯詩箋一柄
俱乞留神轉致不勝依依

答毛禹門

武林李名一郡耳而實領袖東西越老年丈之政術文采風流又
事事領袖人謂六橋三竺得使君而益勝良然乃年丈過自挹損
若恤恤乎有動于時艱者此大君子先憂之至心也弟久困鈐索
遇眼前一切人與事格格不入麋鹿之性應在長林豐草間耳

答瞿星卿

自台丈操觚而吳荻爲之一新自台丈秉鐸而楚風爲之一變今士大夫中真有功於斯文者台丈一人而已天將大恢令緒協輔清時遂以風雲之資授箕裘之器不獨文章世美爲儕輩景趨而意氣惇惇常有以自下者政以此卜遠到也第三載鈴索忍饑待詔無可爲台丈道者猥辱慙諭極感記存勒上謝言卽以代訊

與龔蘭谷

逕啟福建汀州府歸化令周君憲章不肖之社友又姻家也遊庠時每試與不肖相甲乙績學知名者三十年而不得一第識者惋焉其爲令孳孳節愛纖塵不染茲以考績及于恩典唯是華袞之章所以賁往詔來者有天子之代言在遂因不肖以請于掌記幸老先生不靳粉飾使可勒之金石揭之堂構此周氏子孫百世之乾坤正氣集

卷三百六

九

光華也干溷清嚴不勝悚仄

與從子太質

姪行叔正在窘中無能爲腰纏之助殊愧乎其爲叔也劉文叔仁人君子幸好周旋必有大裨於姪行業也吾輩或出或處或枯寂或逍遙皆有本等行業自古無不至誠之節俠無不淡泊之風流學問中大好着脚也願吾姪就在簡一門自成片段卽縱橫遊戲無所不可矣一第云乎哉

答夏習池業師

小兒入京拜函貺之辱似非長者所施于弟子也備審願養安和郎君藻筆翩翩極懌遠念不肖三載鈴索日碌碌耐應讀書實無所得以此上慙恩造下愧頭顱思得靜息山中爲十年讀書之計而忍饑待詔旦晚未得脫身是以先遣賤累南還料理兒女子事

若目下得旨賤體性暑難行又未免稍待秋風也知垂念拳切縷縷附悞賤累臨發值署中文字相迫草草報謝不盡願言

答袁小修

會石法知仁兄念我不置感哉感哉弟之心事仁兄所知也世人強置之一網中世人自可笑耳于我何與弟見年來言者與辨言者嗷嗷之口造成冤劫夫言者不過奪人官辨言者則幾于哭官矣弟非爲官忍人直自顧鬚眉不肯哭官耳弟卽行尙須仁兄一晤也

別同館諸兄弟書

弟自慙劣質叨廁英游三年之中入則筆硯相從出則軫蹄相次道誼骨肉之好悅如一日也夫三年一日則一日千秋矣郊居匝月煩煩過從旣好憫之又飲餞之臨別之際握手依依自有同籍乾坤正氣集

卷三百六

十

自有同館恐未有如吾兄弟之篤摯者也弟南矣雄飛雌伏接翼無期勉事聖君光我山澤

與楊大洪

不肖於翁臺分則君侯情則兄弟此非沾沾繼繼之私也以翁臺至公血誠不流不倚所謂奴隸小人亦知其清明者況吾黨乎不肖晚來一遇會時之艱微嚮所託誰可告語翁臺不肖知己也不肖歸矣便可不復出翁臺暫歸不可不早出非獨處勢使然要以有翁臺在政不須我耳見梅長公寄問山居無恙役人還草此代謝舍親趙元度文度與叔度之子想翁臺以賢者之後道地於新父母矣唯是元度家貧薄宦先業盡洗不過瘠鹵田二頃耳而戶上田數頗不貴蓋合兄弟伯叔而合爲一戶不使分析先少宰之教也今老父母爲趙氏計無使元度有厚產之嫌無使其叔季氏

有過厚于其伯氏之嫌概及張父母之覆庇則皆老父母庇之矣蓋文度以元度之盡廢矣撐持轉苦而叔度之子名士履者孤露顛覆尙不成青衿今日將官戶之名可以稍庇兩家而知其情事之實則伯氏又可以免於富公子之累惟翁臺知之真念之切可以此言告也不肖情誼關切附言及此至感知惜別總非寸牘所傳耳

答李夢白

國是紛紜惟不嗜殺者能一之則翁臺其入也不肖竊睹江陵以後士大夫筆爭舌戰者數十年矣已有兵機而未及於兵禍蓋九廟在天實式靈之今欲挽其機塞其禍非有真心腸大學問而神機妙手足以副之者未克濟也翁臺其人哉頃者齊魯荒亂自節鉞甫臨而人心遂定天意從之此其效已睹矣如不肖書生不了乾坤正氣集

卷三百十八

十一

旋遭網羅其故似爲知己所悉而亦見其神之漏根之劣相感召也此事自關學問翁臺何以惠教之做鄉畢東老正人又解人也翁臺可以此事時時切磋大洪暫請假矣幸翁臺遙相護持使大洪早見其用護才以救世也凡天下事所潛賴于大君子者不少豈以袞繡東山而一日忘宗京之計哉還山之人僭言及此恃翁臺知已耳

與李長蘅

去秋被言而歸便擬撥一棹從仁兄于煙水之間無奈京債并兒女債連相煎逼蹙蹙無樂生之氣以爲仁兄翰墨神僊也俄聞爲女郎遣嫁甚苦而齋中清醞并入偷兒之手則仁兄雅抱亦少損矣政欲相訊適友人高聲野過南翔便附起居聲野過南翔謂不見長蘅未免俗氣命一字導之然聲野之子南翔終未能免俗乞

長蘅一言解紛聲野景逸先生之愛弟也弟又犯東林嫌矣一笑
答門生汪如石

春明一別遂易寒暑不肖歸而杜門課子却有餘適只是京債債
還債端無窮從此不知所究竟耳此病與賢同受故以相告他世
局之事毫不以望胸臆也承寄顧玉川書四月中纔到知相念之
深然貧者出門甚難唯同病人知之不以望相知也人不可輕諾
去秋歸只諾書賈一語至今未了強看毛頭書終是山人苦事
今勉就三百餘六七月之間便可出也評閱姓氏少不得借重相
知所委太夫人祝言義不得辭然須辦選事然後得暇可以泚筆
題旌重典而欲借重于山人則左矣

與趙太室

翁臺志意揭日月衡鑒審簡匪嚴而好賢護善孜孜不及真人
乾坤正氣集卷三百十八

倫之師表也竟以此左時起少見齟齬今之爲君子者難哉乃者
六年計典盡快私門卽以做鄉一介不取之孫淇老而不免於議
何也翁臺知淇老者亦爲之咄咄耶竊謂適年以來士大夫議論
多以衆寡分勝負而未嘗以勝負之外分是非繇銓衡失柄無所
折衷耳夫使銓部爲政有不當而言路執簡隨之則可使言路爲
政無間當不當而銓部如指行之則不可轉其機還其柄是在翁
臺而今非其會也姑息焉以待可乎不肖竄伏江干無心問世適
丙姪李仲達司理南康憑寄寸牘聊寫年來積嚮耳仲達醇赤未
雕風氣差上恐年少不習爲吏如其伏謁幸長者教之世道多虞
萬自珍愛

答吳孝廉問卿

日以村居失於逢迎故以數行告其疎節何更遠使至土厓令祖

老先生之鼎翰益使不肖踟躕無以自寧甚矣老先生之愛人無已也若門下過自挹損置人於長者之列又豈不肖所敢當乎門下韶年盛藻縱轡有餘饒讀十年書橫行一萬里敬爲門下左券毋以習之籠中有悲鳴之思也聞仲兄異才瞻學羽翮已具恨不就見之所示令姪文英英可人嫌用時語太多致神明未透此一得之愚僭用商畧然所謂時語者厭套耳不厭新也居今之世專以大雅典型髡少年之筆則悞人多矣一番洗脫則一番變化亦以爲門下告也不肖習心未除偶爾及之附發一笑來餉茗墨俱全此二事不肖俱有宿癖而於墨理尤辨所藏邵墨多與來餉相似其品反不及時製卽羅小華者亦然方正者形陋而神勝之彼此皆同非有贗也唯近日程君房之元元靈氣方于魯之青麟髓可謂超出前人然出於數年前老手者爲真今其後人爲之已成乾坤正氣集

卷三百十八

三

濫惡矣墨雖佳經霉卽敗令先公所遺得無藏之不固乎不善書而談墨猶不善酒而理釀具也笑笑

與古安吉

亡友吳士豪白首明經一官未赴祇以領牒選人備貴州察佐之末爲君侯所軫卹旣經紀其喪又收其子弟置之帷中異哉君侯之設誼也昔文季遺賑於堪孤巨卿種樹於紹墓非同里結盟則垂髻托契千載而下尙爲美談若夫公車一日之交半刺尙虛之席何有何無而君侯爲德至此求之古人所未經見况今人乎僕是以願得君侯而下之也忽枉箋教托寄栩栩展讀大集嘗鼎一鬻矣糠粃之導其何敢辭

與錢梅谷

台從每過江城不肖以村居失逐頃者適及之而僂鷁飄然不可

挽矣殊愧君山東道主也然鄙人有心願請於門下豈以杯酒乾
餼之故乎世事瀾翻正人氣盡指名連類伏機甚毒長此未寧恐
漁歌樵唱之非我輩之所得有也仁兄何以策之茲趙少宰定宇
先生之仲子文度兄以逆奴戴修之事告急于吳門諸公諸公
慷慨發書直抵江夏以去戴返戴皆江夏之爲也事具諸公公牘
與趙氏辨揭中不肖謂江夏雖有郤於林下而尙與仁兄有緣仁
兄飛咫尺之書訟其本末而可以實諸公之言塞黠奴之口而寢
其計扶正抑邪關係不小仁兄豈多讓哉尙有幾微欲躬詣門下
盡其所以而以他事不果屬湛老轉陳統唯裁炤文度品識超俗
眞不愧少宰之子試與之言當不知其膝之前也

與李仲達

數日前因萬年使郵附上八行此君千里徵書祇援同籍之誼轉

乾坤正氣集

卷三百六

十四

徵寵靈度其事機多不及矣茲啟廬山歸宗寺僧修慈者戒行清
嚴識解通利眞法門之領袖也與函伯賀丈爲莫逆同叅而所謂
歸宗寺者乃爲近日愁山禪師駐錫投老之處函伯之大父觀察
澹菴先生作守南康旌廬山有香火緣曾合賀氏宗人鑄一大雄
像奉安於寺中故函伯於此寺道緣良深法侶不絕從來久矣謂
以足下爲廬山主應從蓮花會上現宰官身而護法者願因不肖
乞靈於足下也此僧久客江南還山習靜有何他求貪得使君示
意保持使維摩方丈不爲闡提所侵足矣又聞閩中謝耳伯棄家
學道棲進此山可一問之廬山志乞寄一冊適聞有芳訛見及尙
未接到也

與門生魏叔子

秋事不必言只將來不可放過耳聞修西方者單提念佛法門僕

爲修北方者單提作文法門足下是頓悟人恐以此言爲鈍也陳心齋相骨有神具道足下體中不凡足下再舉看便可豫辦北行糧矣

與門生顧爽之

足下十三載公車矣今日乃與木之雁行功名事安可料耶此行並奪錦標使林中故人借被末光幸甚以足下才氣無前而侵尋五舉以傳老鈍之鉢者背城一戰在此日矣王新之當共集都下三君聚首濡毫吮筆賦上林而奏甘泉不亦一時盛事乎都中故人有問及不肖者可云已戢身一畝作老農老圃行徑而已此眞實語也

寄臺翁葉老師

都中奉老師之教歛形塞兌頗無咎于人自某入而風波突起旣乾坤正氣集

卷三百七

五

逐之後猶欲網之計典賴隨州館師南昌院長力爲保持存此一綫不入長安門不知世路之險惡也憶昔絳帳出入肺腑相示敝履遺簪之恤亮千里不遺耳老師社稷之功時所最忌會一臺中有家庭之怨于司馬而獬口遂乘之以撼宗伯故糾拾大僚首粘此義以三人同功一體也及乎邊塵忽起戰守議紛歧中之歧轉生趨背諸人欲守其完局不得不去其敗群然而異同亦稍見矣今揆地單虛人心各有盟主不知司馬公再入所與同心反正如呂晦叔者屬何人也幸老師早留意焉龍蛇之蟄也所以存身卽所以變化然蟄之將啓也必乘驚雷以爲用今日仰觀俯察亦將驚將啓之候矣某一官未任早入錮籍已矣何言望老師早還中書去中朝之黨去河北之賊實不勝拳拳

答顧亭之木之

承諭千秋之典責在後死其又何辭適萬公祖尙在江署卽往謁
之大煩分疏渠以王院臨行之舉止動支江陰節省銀兩未經覆
覈題請入無錫祀典之內日下丁祭所費未便申報不肖謂鄉評
已定題請當在後日今直以祭之舉廢爲一時重輕耳至于祭品
之所出自可權宜不必申報惟其不必申報保無異同貽老公祖
之累也渠乃欣然云如此纔便奉行而又喃喃微語若受制于時
論者敬費此商確愚謂此公到縣門下宜預拉群從一見告以年
來相沿而不廢者全憑此舉爲斷案若歸德于此公者然則濟矣
恃愛露其曲折并與高景老言之以求全安景老不另啟

與沈哀中

同年故西安令俞君宣清辭豔發介性孤標菽譜循良咸超倫伍
而一官未終二豎見迫此吾黨之所共惻也今其老母寡妻與弱
乾坤正氣集卷三百十八
子爲命而家無餘殖官無剩橐窳之事尙未謀舉堂室蕭蕭見
之流涕幸老公祖在事百凡有托而其子臣度亦成諸生矣第吳
俗浮薄炎涼易態望老公祖特垂末光一盼矚之夫簪履之恤自
老公祖至心無煩不肖助發也弟行矣意氣之托萬祈炤亮

答顧塵客

吾黨不徒貴心正實貴眼明自道徒南還長安諸君子恐遂化爲
頑金矣如何不肖時適智窮原非其器所賴碩果得輿牽復可望
世事有濟復何須在我也仁兄勉之姚孟長書來託重不淺正欲
約仁兄談所未談而澹如相呼顧往群邑計下旬得請于左右也
明燈之惠光我蓬室謝謝

答李夢白

頻歲東師勞苦迄無成功獨水陸輸輓不至乏絕者台臺一人之

功也今口禍剝膚廟堂尙無成算棟撓榱崩僑將壓焉惟藉重臣
操鑰恃以無恐若旦暮入秉中樞廓清底定豈顧問哉不肖向者
避言還里會台臺撫東土使使者勞之境上誼高千古于今不忘
乃者漫然小草適際艱危憂時有念補天無力所餘耿耿差不負
海內相期耳忽從傳遽獲奉良書知台臺之不遐棄我也三肅使
者拜命之辱

與史磐石

三年黎火朝夕爲群至若掇皮皆眞肝膽映徹孰有如我兩人之
相諭者乎弟旣避言伏里年兄旋奉諱廬居耿耿此心夢魂時告
比年兄入踐西臺弟亦漫然小草以季春之月抵都諸兄弟皆集
獨年兄持斧韓年兄持節萬里比鄰斯之謂矣遼瀋連陷京師震
驚公車交章未有堅決年兄必有長策紆謀非時入告望之望之
乾坤正氣集

卷三百六

七

家臬副西垣以入賀來京因其便郵附布遠念家弟守官居鄉頗
見信于賢達今得趨侍下風幸甚幸甚望年兄垂念年譜過採官
評粉飾獎借高其月旦賤兄弟之感當何如哉

與胡蓬元

雪堂倒屣赤壁清樽不覺形神俱洽年兄蘭譜情深與江流俱永
矣過蘄水一展拜先師閔翼墟爲之越宿閔翼墟師者故通參前
爲常州司理識不肖於諸生者也先師爲理清執而惠做郡人至
今思之旣晉銓曹一意秉公貴人有所不悅借中旨改南以此時
望益歸淳厯銀臺駸駸顯重矣而竟不祿君子惜之所居官皆以
風裁敏辦才守有聞其居鄉則闔門自守無論請託卽平常交際
一切謝絕輿服無所飾廬畝無所拓蕭然門庭比於寒士近世士
大夫少此風味矣今士論久定前守李公以崇祀請於學使尙未

報可望年兄留記得申前請幸甚其遺孤二人幼者尚在懷抱長者僅十二齡秀慧可喜今姚庶常之婿也聞有耽耽旁睨其產至勾連無藉誣訟公庭幸年兄片言折之此師母之指也不敢不以聞

答丁嘿存

辨天下事者不難其才而難其氣又不難其氣而難其識古之嘲哂豪傑貽籍貴勢者其氣勝也至于策是非論成敗若神者之先告則非識不與焉先生可謂有其識矣而邁往不折之氣又足以配之故世之需先生如占事之有筮龜負重之有賁育也乃者中外搶攘所在見告人心皇皇朝不謀夕先生有長算紆謨入告天子以收底定之勳者乎日幾幾焉望之若夫鸞龍鳳之文修黼黻之用執經講幄珥筆承明自儒臣之能事不足爲先生誦矣捧誦乾坤正氣集卷三百十八

大

鼎函獎引過當某不肖何以酬知于萬一也

與吏部爲龔蘭谷請卹公書

謹啓宮諭龔蘭谷乙卯充東宮講官丁巳叅藩未任嗣奉先帝恩詔一體敘錄姓名蓋凡屬宮僚不論講筵久暫勳望差等會否外轉槩從優擢卹錄總之以講官二字爲重亦既無不遍之恩矣蘭谷子幼家落歲月坐淹生等以明恩不可辜負爰引一介具奏昨蒙禮部覆允諭祭爲講官非爲叅伯也至贈廕一節耑候台臺主持生等極知銓務煩劇未敢造瀾靜聽久之歷夏屆冬輒敢合詞上請卽事當慎重而例無異同原非踰涯之請也伏乞台臺一視推仁早賜題覆庶生死骨肉君恩如天台德亦如天矣

答宋又希

台臺之治虞也清而不峭察而不苛寬而有執修赤子之和而遇

士大夫以禮可謂不剛不柔宜民宜人者矣至於宏長風流許與
氣類緇衣之好若于吾黨加殷焉二三兄弟所以相傳慕誦謂君
侯人倫之冠冕善類之干城也彼夫輕雲翳日微波拂海曾何足
累而當途諸公業有定鑿矣豈區區齒牙之助乎然肝腎可竭不
敢不效也

答孫六吉

不肖年少氣盛亦嘗有志于作者之途乃半生雕蟲強半糜于公
車晚來一遇精已銷亡矣又館試之文多忌少吐未免委宛以寄
意固不足陳于大雅也明公方大揚正始之音振吳風百年之敝
而乃過採虛譽獎節非倫令人愧死承示試文開函莊誦已嘗鼎
一臠矣大都刊去浮詞則神色自異信崇正之與拔奇道未有相
悖者也尙容卒業傳示子弟短疏申謝不盡仰止

乾坤正氣集

卷三百六

九

答貢二山

翁丈以文士而偏工吏治東白之政遂爲越中第一此一奇也選
君屬貴治舉賢自代則水鏡之司應爲邑中直破天盲卽豸冠簪
筆自是君家故事不足侈矣弟衰疲已甚木石緣深祇以英簪在
筓委莽是懼勉強一出卽賦歸來不敢爲知已漫也山中日歷杖
頭酒資頽自千里意念良深頻行報謝并以不腆之文稿附呈記
室臨楮依依

答陳益吾

年翁忽有庭幃之憾不肖實深家國之感公私關切惋慨可知卽
擬走唁左右而病軀孱弱尙不能前數日之後當了此念耳承諭
楊生自年翁憐才至心亦不肖所同也此中品題已定又復阻扼
卽敝邑寡君亦袖手而歎士風至此斯已極矣不肖諷生此不可

與爭鋒江之役其報在虞我寡君之責也而不肖亦不敢自愛其
舌敬以此復年翁矣執手非遙書不盡意

答顧中翰

以執紼在邇不先執手丈無問其疎也臥病兼旬偃蹇來命滋不
安耳太公嫜節不勝書弟從藥裏中憊憊抽思再置再續殊不成
片段見眉公排纂詳縟受之標揭簡貴小巫之所以氣索也稍可
存者真而已合傳非體前已告之而聖善不朽已備名筆矣一切
歛署不能從俗幸亮

答袁漢陰

台臺神識清湛風猷卓然自是國家有用人亦是世道倚賴人非
今之所稱清吏循吏才吏區區以官方職業相繩量者也不肖二
過練湖獲望丰采兼聆輿人之誦與一二相知之所稱述約畧不
乾坤正氣集卷三百六十八
遠竊竊慕用而台臺于不肖亦若殷然有意者神遇之知固不在
竿牘往來間矣

與徐叅掖

會稽錢麟翁宗伯弟本房座師也正學醇品士大夫久欽之
南中緣何有此議論弟在北呼號不及乞年兄鼎言銷弭之弟
以告年兄使年兄知爲弟師耳萬祈嚙存至年兄正大之識蹇諤
之風凜凜見于垣草而又不爲一切影響掇拾所以得佳不肖冷
心冷局不敢與人事但願正人君子立交戟之地者知無不言言
必有中盡如吾年臺者而已今口謀叵測黔辱未洗蜀孽方崇而
中朝士夫名爲正人君子者無端忽起戈矛自相撞拗可奈何而
又妄相測度以訛傳訛如做座師之事更可怪也不知吾師之居
身居官居鄉者久矣無異議矣

答吳本如

今之薊鎮不獨防口而實以防口今薊之督撫不獨修戰修備修
欸而兼以修當關之和自非老成名德而文武兼雄誠才兩合者
不勝其任也朝廷特簡明公良有深意恭承檠戟新開旌旗色變
業已成誓諸夷而風行四塞矣未鳴燕喜遙企龍光敬報郵問之
辱

與陳令威

弟與年臺臭味風雲千里無爽而咫尺燕中僅得一二見可笑歎
也忽不知年臺何以竟出許大長安多少部曹郎斬陳令威半席
地此亦銓材者之責歟今天下重兵宿將聚於關門當關者所上
功罪實與李官相表裏願年臺益加精鍊以膺節鉞孫愷老處弟
已具誦年臺之品望矣

乾坤正氣集

卷三百八

三

答王坦山

自丙辰一覲清光不肖遂避言還里而台臺亦復澹散南郎遭迺
許時次登銓署乃群公競進通懷泊如每語相知居今之世安得
有真才真品不求不伎如王先生其人者乎比者榮參九列差強
人意而霖雨之用則幾幾望之矣辱委命甚重不敢仰虛會用寶
期迫徵前諾者填戶意欲俟之來春得稍儲餘思以襄盛典而今
親杜給諫云必不可遲無已從紛沓中捉筆爲之愧無一語足當
上掩天藻下蔽鴻烈罪如之何

答李湘洲

二札

當今之時而尙遲閣下三年之用天固未可知或待其既極而別
施洗刷或待其小定而徐下均調不有救于今必有補于後也伏
祈勉抑孝思嘿承天眷臨楮不任皈依

緘題久具而役者遲行致羈報命世事翻覆遂及官府非常之變動閣下聞之感憤當何如也惟老先生身關氣運故家艱國恤先後並軫宜倍自珍重需時轉旋矚望不淺

答田陸海

忝惟繡斧南巡綱紀惟肅風稜霜錫淬兩越而映三吳甚休甚盛今四方之妖氛未靖東南之民力已窮所恃以剔蠹塞穴獎廉砥頑爲國家佐緩急彰輝者微台臺疇望哉不肖家寄荒江仰承芳蔭擬叱筆以奏謳謠而五色雲箋從天際飛墜遂使燃格增輝冰銜乍煖明德侈矣何修以稱尤望驄馬早還主持國是不勝瞻矚

答瞿稼軒

不肖與令先公之交在若遠若近間而文章聲氣則如針芥投而

乾坤正氣集

卷三百六

三

膠漆合卽辛酉楚材爲不肖所弋獲者大半經令先公提獎聞令先公病中亦舉以爲快事而竟不及一執手言訣此不肖所耿耿于心也惟門下以命世之才負經世之畧將興雲霧而沛霖雨乃俛就閒寂之人問枯槁之業諄諄款款若以令先公之好好之者似非近世之所有也伏審祥琴在邇脂車可期萬惟珍重以膺特簡臨書矚矚

答吳石袍

台臺之爲李而僅得清曹郎且又南也世無復官評矣識者曰惟其以如是之巍望而得如是之平進其特撿恬節亦非復他清才吏之所有是天之所以相豪傑也竊窺台臺淵湛清立灑然物表而物不得移之庶幾乎人倫之水鑑者今雖在南祠隱然係天下之望不肖一隙心知隱約券之矣何至設不必然之慮如札論所

云耶感托寄之深儻可讚述之處亦不敢不勉此亦不肖之積愆
云爾豈謂有助於風雲也乎

答張篤棊

遠承芳訊已具報章再領嗣音深慚托寄不肖謏劣無似所恃以
信于海內知交者此一片熱腸耳不謂台臺能照之于數千里外
也今世波瀾洞時事紛紜非得名世大賢立于表著之地主持清
議檣柱末流國家之事有不可言者矣故今日之倚重台臺猶涉
險之舟航承撓之柱礎也凡我同志躍躍以幾又豈獨不肖同門
之私誼哉

與蔣尊陽

臺役歸附致縷縷定徹台前矣翁丈見弟請告之旨得無爲弟咄
咄稱怪動不平之感乎弟以應山一疏爲此奴所甘心延頸以待
乾坤正氣集

卷三百六

三

卽欲爲冥鴻未可得也抵灣日有敝門生高安令之便郵粘筆數
行代候新祉令楚黃名士弟闡中極賞其文竟得聯第其自安仁
調高安則高安之土夫聞其廉辦而欲得之其治行似無害己高
安邑大而民疲且多猾歲課屢不完當此叅罰嚴急之時左支右
吾令亦甚苦幸翁丈在事體卹下僚保持屬吏是諸邑之所嚮風
者倘高風可備驅策更推弟之屋烏而分外加意教之誨之卵之
翼之獎之飾之掩之覆之得奏三年之績備異日之用則如天之
福不肖弟與有榮焉去國之人絕意世事而獨爲此令欸欸亦門
墻之私不能自己耳惟俯存之榮誥事一切屬之中書科李書辦
矣

與左浮邱

進賢退不肖山公職也而進者必賢退者必不肖誰深心左右之

者今日乃舉爲年兄舉案矣嗟乎當小人之伏莽也恨不疾去之爲快不疾去之則以君子爲姑息耳及小人媚竈得志又以爲吾黨激成之然則爲君子者難哉出都時聲息洶洶弟蒙譴猶薄世未有內外欲殺而能免者也縱山深林密當有緇弋之者矣

與金雙南

初擬至德州報命舟過津門而南則逆流淺澁日不能數十里而風雨間之芒復遲遲度翁丈幾以爲侵諾矣弟旣拙于辭筆又不得世美之詳祇依仿前次辭頭約畧具體恐不當顯揚至心若翁丈之芳標瑋烈著于堂廟則山公太始之制異日自有秉如椽者固不以目前重輕矣廓園所屬亦不成語奈何欲作一字寄園公畢竟無可寄蓋世事已在邸報中無憤世救世何處著一詞若世外之間亦非一幅紙所能盡也入山之人暫脫于鼎鑊終未知所乾坤正氣集卷三百六

書

稅駕耳臨風惘然

答解石帆

弟不肖固陋人也守官都中自潤色編摩之外何與人事乃風波橫起雷霆迅驚事連鉤黨名在丹書弟處此可謂酷矣年兄憐我念我越江遣問憫諭綢繆高義雲天千古無兩惟年兄不倚不流爲時砥柱望早還交戟之中主贊清平之議又何幸歟文織之贈愧非白屋所當仰承若比于綈袍敢不拜

答毛禹門

今日之禍蓋人事天心一齊奏合彼其徒日以殺人爲戲殺不盡不休卽世上顯然之是非與其自身必然之利害都不曾思算一過非真有亂天下之才與智而天下之亂從此不可收拾矣吾輩不死于法卽死兵所患不止于罪累鉗織已也近見奉旨再鞫楊

左改移宮爲護熊以封疆爲題殺之爲有名嗟乎巧則巧矣然可
瞞一時耳目恐瞞不得萬世人心也吾輩十五人則以招權納賄
爲題所坐有差等或云萬或云千夫辱之以賊猶可窮之以必不
可追之賊直殺而已殺亦何可逃乎事雖從中皆從外決北人爲
政風自南來此長安時局之大端也六君子之後孩未繼之彼六
人者皆入而就死地矣孩未能免乎痛心驚骨夢魂飛繞我輩雖
生不如死也往吳門晤昭自故爾遲答

09972

乾坤正氣集

卷三百七

五

